

摘藻堂四庫全書薈要

集部

欽定四庫全書薈要卷一萬五千八百六十

集部

梅溪後集卷四

宋 王十朋 撰

詩

州宅

鑑水稽山擁卧龍  
黃堂人似坐仙宮  
風流惟有元才子  
終日賦詩屏障中

蓬萊閣

祖龍車轍遍塵寰  
只道蓬萊在海間  
空上望秦山上望

不知此處是神山

清白堂

堂與泉皆范  
大正公名之

錢清地古思劉寵

錢清地名父  
老送劉寵處

泉白堂虛憶范公印綬

紛紛會稽守誰能無愧二賢風

清白泉

聖人達節猶憎盜志士清心肯飲貪  
試向卧龍山下酌  
世間無似此泉甘

觀風堂

薄俗澆風有萬端欲將眼力見應難但令心境無塵垢  
端坐斯堂便可觀

望月臺

明珠遙吐卧龍頭漸覺清光萬里浮人望使君如望月  
要須如鏡莫如鉤

秦望閣

紙上觀秦尚過秦那堪山作眼中塵為言高閣登臨者  
莫作秦人視越人

望海亭

踏雪遥登望海亭扶桑日上卧龍醒  
微臣望處非滄海只望堯天萬里青

卧龍山

鑑水連天僅可容稽山照眼五雲濃  
只憂旱歲無霖雨誰識東州有卧龍

種山

決策平吳霸業成青山長占大夫名  
子胥忠義無生死

怒氣隨潮到越城

競秀閣

憲臺高閣偶躋攀萬壑千岩指顧間  
山色原來本無競人心自是錯看山

戴山

十九年間膽厭厭嘗盤羞野菜當含香  
春風又長新芽甲好擷青青薦越王

八松

瀟洒荀家好弟兄  
秦封不污有餘清  
鍾成一種棟梁氣  
散作八方風雨聲

右軍祠堂

欲弔右軍千載魂  
祠堂荆棘斷碑存  
老僧相見話前事  
問我蘭亭幾世孫

鵝池

鵝鵝能鳴異衆禽  
池邊墨客最知音  
世間多是山陰姬  
應恐悞猜君子心

硯池

鳳翥龍蟠字字奇  
陶泓湯沐向斯池  
波心雨後一魚躍  
猶似昔年吞墨時

題扇橋

右軍一畫千金重  
妙意寧容市嫗知  
明日重來堪一笑  
管城那肯更臨池

雷門

吳越興亡事若何  
譙門遺迹枕山阿  
大聲曾作雷霆震



應笑人間布鼓多

曲水閣

太守蔣堂所建  
今號飛蓋堂

王謝蘭亭久寂寥  
茂林脩竹自蕭騷  
蔣侯近代風流守  
曲水流觴意亦高

西園

西園風物冠東州  
飛蓋紛紛爛漫游  
惟有紅蓮幕中客  
倚欄纔得片時留

望湖亭

杖屨登臨望鑑湖，湖中一半已湮蕪。  
誰能更繼東都守，長使山陰水旱無。

吳先生祠

右軍宅化空王寺，祕監家為羽士宮。  
惟有先生舊池館，春風歸在杏壇中。

賀知章祠

賀老祠堂枕鑑湖，霓裳羽化宅荒蕪。  
無人更問君王覓，轉使高風千載孤。

鑑湖

胷中萬頃元才子方外孤標賀季真  
鑑水縈回三百里風流何止兩唐人

禹廟

越國遺民念帝功稽山廟貌勝卑宮  
少陵莫歎丹青落紙上丹青自不窮

菲泉

楚王宮近夏王宮一水清含節儉風  
越俗不知王好惡

泉名却在酒名中

禹穴

好古貪奇司馬遷  
胷中史記越山川  
如今禹穴無尋處

洞鎖陽明石一拳

禹穴道家謂之陽明洞天

馬太守廟

會稽疏鑿自東都  
太守功從禹後無  
能使越人懷舊德  
至今廟食賀家湖

吳越王廟

一劒功成三節還盡將錦綉裹江山斗牛氣滅英靈泯  
廟比昭王屋一間

望秦山

洛思昔有人思洛秦望今無客望秦回首長安在何處  
誰能念彼下泉人

少微山

出郭舟行十里間少微山近若黃山山中處士已長往  
一點客星雲外閒

梅梁

結實幾調商鼎味成材宜作禹祠梁  
世間何歲無風雨  
鐵鎖無端誤見殃

窆石

越俗流傳素可疑

退之詩云越俗不好古流傳失其真

禹陵窆石果何時

只應便是專車骨未可呼為沒字碑

窆石形真有數字磨滅不可曉或以

為古碑

和昌齡弟見寄

經年遊官思家鄉枕間魂夢長飛揚甌越相望數百里  
魚鴈來往安能常水綠蓮紅王儉幕我愧才疎筆常閣  
居官不事羨長卿執一無權猶子莫昔年姜被今獨眠  
何時更作三珠連左原風物亦不惡溪蓴抽絲蕨吐拳  
阿連春草詩篇好勸我歸來宜及早代笠亭前烟雨中  
共把鋤犁寧待老

懷喻叔奇

巳卯

結得賢關鴈塔因東州相遇益相親凌雲三賦我慚馬

清唱百篇君勝秦冀北羣空殊惜別江東日暮倍傷神  
同年四百二十六莫逆論交能幾人

次韵周堯夫贈睡香

長向春前臘後開要將風味鬪梅魁名從廬阜夢中得  
根自鄖山嘉處來風折錦囊香不斷日烘寶蓋翠成堆  
定須移向梅谿去栽伴吾廬桂與槐

送陳元佐游四明

鑑水悠悠接鄖川宦情客況兩淒然扁舟乘興梅花月



樽酒送行燈火天我似鄭虔官舍冷君如馮子主人賔  
虞庠春榜無多日行看香名動日邊

聞禮生日 二月二

桃水仲春月冀階雙莢生添丁慰盧老子慶徐卿稟  
得中和氣看成遠大名青春已如許勉力繼家聲

次韵趙觀使鴛鴦梅

奴視紛紛暫與休芳心那肯貯離愁結成冰玉岳湛侶  
開伴紵羅施鄭流影照嬋娟如並卧枝橫清淺似雙浮

不知他日調金鼎勝得櫻桃氣味不

亡友孫子尚藁塋會稽山大禹寺之側某至官  
八日出郊訪其墓不獲明年春被命祀禹訪而  
得之又明年春再往酌酒因植栢十根哭之以

詩

疇昔相知似弟昆那知半世死生分無緣更飲盃中物  
想見能修地下文有媿乘車塋元伯僅同解劍弔徐君  
他年黛色參天處是子會稽山下墳

子尚墓種柏

子尚乃如許壯年墳已荒我來親種柏含淚待蒼蒼

鄭夫人挽詞

好谿太守非常好慈母端如孟母賢熊膽調成真器業  
魚軒游徧舊山川顏間日有平反喜方外時修香火緣  
身世九齡家萬石定應含笑向重泉

錢夫人挽詞

忠孝之家女亦良教傳彤管有遺芳藁砧舊擢儒林秀

桂子新飄月窟香方擬魚軒霑寵渥遽驚風樹變淒涼  
稽山鑑水青春暮殢露聲中恨更長

連月不雨農事失時府帥決獄廩饑德政動天  
霈然而雨某吟成律詩一章以賀

旱魃為灾罕似今霈然一雨慰羣心非關菩薩解為澤  
自是使君能作霖躬慮滯囚寃盡釋廣開義廩惠尤深  
佇公歸國調元氣散盡愆陽與伏陰

次韵濮太尉喜雨

去歲秋大水民食方苦艱丁壯尚流離而況白與班今  
春又不雨事與安危關使符下列郡呼雩舞童鬟投文  
責老龍貪睡何癡頑我聞救災術迺在人事間興師古  
有衛決獄唐稱顏年因弔伐有雨送輶車還嗟此旱魃  
虐和氣知誰干半歲幸一雨人心寧不歡麥秀禾可植  
田里庶少安上紓當宁憂吏責亦稍寬我家蕭峯下山  
長路漫漫東臯有先業頗亦知艱難歸耕願及早免起  
將蕪嘆

叔父寶印師往永嘉妙果院未朞年而退弟子  
德純住龍翔一日歸省其師亦退居林下緇素  
挽留之乃遁於異郡不踰月間師弟子相繼退  
休識者高之目為僧中二疏某竊祿將二考矣  
有媿二高僧因書一絕庶幾他日或蹈其高躅  
云

掛冠林下近來無誰謂僧中有二疏應笑紅蓮幕中客  
故園三徑已荒蕪

寄黃簿

文昌

六一移書責司諫聲隅聞命避徂徠茲風不作已久矣  
吾子所為何壯哉在列諸公頗有媿附炎羣小膽應摧  
要須終始全名節莫遣心隨利祿回

次韵濮十太尉題禹穴

窠瀛三十六名郡越在東南雄四鎮宛委周回三百里  
草木山川有光潤秦山鑑水蘊秀異人物風流夸漢晉  
傳聞禹穴自太史好古無人若為問

韓退之詩云越俗  
不好古流傳失其

真杖屨飄然尋洞天  
照眼千巖若攢刃  
細看磐石心愈  
疑遐想丹書氣  
猶振禹貢無傳  
豈其闕遁甲所  
書何足  
訓彛倫叙自九疇  
錫水土平繇五行  
順洛書六十有五  
字玉業巍巍此途  
進八卷飛沉天與  
泉茲說荒唐理難  
信吾儕去古恨太  
遠企首難窺禹牆  
仞穴傍有井清且  
甘一酌端能洗驕  
吝

薛師約撫幹召飯于圓通寺主僧淪茗索詩

綠暗梅欲雨  
風薰麥初秋  
官舍厭卑濕  
僧廬訪清幽  
儒



餐慣蔬飯道話便茶甌鑑湖倘容覓杖屨時來遊

潘知縣

句

弟撫幹

時

和詩復用前韻

堂堂紫微公氣節橫清秋風流屬猶子胃壑羅奇幽詩  
篇粲華萼名字宜金甌州縣聊爾耳行矣天池遊

酬富陽張叔清縣尉

尺素遥傳到越城入懷珠玉照人明登科雅服才名早  
筮仕喜聞官業清空把交情對山色

來詩有吳山空對越山明之句

要

令音問讀潮聲忽忽作答無他語莫羨人間勢利榮

周德貽得子以錢果為貺僕不獲為湯餅客賀  
之以詩

雙鯉來從古嶮丘喜聞英物誕東州清和時節綠陰滿  
秀異谿山佳氣浮分貺金錢意殊厚欲為湯餅客無由  
乃翁指日身龍虎況有奇兒氣食牛

喻叔奇迎侍赴桐川榜其堂曰戲綵書來求詩  
寄題一絕

桐川綵捧暫宣威首闢萱堂上壽巵堂上慈顏笑還語

老萊文采媿吾兒

女子生日 五月十二日

吾女何時見薰風欲半時年齡今稍長禮法要須知好  
讀班姬誡休吟謝女詩萱堂有慈母淑德可為師

范文正公祠堂詩 并序

寶元間文正范公自潤徙越治先風化一日獲廢井  
于州治之西澄而新之易舊堂築新亭俱名曰清白  
規官司也閱歲浸久舊刻弗存紹興戊寅秋吏部尚

書王公來帥是邦暇日會僚属于茲堂酌泉煮茗修  
范公故事慨然嘆曰自漢迄今守茲土者亡慮數百  
人莫賢於范堂與泉盡其甘棠也記其可以不刊又  
謂公自筮仕掾桐川典郡帥邊所至立祠獨越無有  
於典為缺於是求公遺像得之於其家比它本為真  
乃命工繪之即其堂而祠焉明年閏六月庚申躬帥  
幕僚祀之某作詩以紀盛事

堂堂范公真天人配我仁祖為元臣材兼文武懷經綸

先憂後樂不為身上與夔禹相等倫正色朝端批逆鱗

三黜愈光名愈聞一麾東游禹所廵作詩懷蠡祠季真

卧龍山麓井久涸綆而汲之清且新堂於其旁記厥因

名標清白垂不泯規爾官司意諄諄洗貪濯盜思還淳

人亡跡在嗟已陳斷碑往往埋荆榛後人不識真天人

但能日飲堂中春

越以清白  
堂名酒

使君好事賢且仁治民律

已惟公遵登堂感慨懷斯人刻石繪像揚清芬丹青炳

耀如麒麟凜然如生見如親躬修祀事率幕賓手酌寒

泉羞澗蘋一酌清我僚吏民再酌為國清簪紳要將清  
白風無垠庶俾范公遺志伸公乎為仙為明神為澤為  
瑞為星辰當宁焦勞思若人九原喚起清邊塵

次韻梁尉秦碑古風

會稽秦頌德碑丞相李斯篆世傳在秦望山莫知所  
在教授莫君好奇嗜古搜訪尤力有言碑在何山者  
莫以語某何山見於圖經在秦望東南疑其真秦望  
也某欣然欲往職有所拘以告會稽尉梁君梁慨然

而行登山果見之碑石僅存字磨滅已盡墨片紙而  
還作古風長韻具記始末因次其韻且記吾三人好  
事之癖亦以示後人也

姬嬴遺迹存者希世傳石鼓稽山碑石鼓掄揚得韓子  
文與二雅爭驅馳秦碑夸大頌功德埋沒草莽無人知  
或言山頂石猶在上有虎豹龍蛇螭神藏鬼護荆棘蔽  
崖懸磴絕登無岐廣文好奇穴探禹梅仙喜事僧尋支  
支遁昔遊越中好山水梁  
仙宿雲門訪古迹于僧  
我贊其行要親覩勿受世俗

流傳欺望秦秦望兩嶄絕何山壁立東南涯豐碑砭植  
最高處不知磨滅從何時剔苔掃墨了無有模糊片紙  
亦足竒濃雲霽霽對黯將雨古木槎牙蟠老枝歸來走筆  
出險語訶政叱斯同小兒詩成得得寫寄我詞嚴意偉  
法退之我聞秦人滅六國酷若犬磔臨江麋先王法為  
秦所負負秦況有秦有司五經灰飛儒濺血堯舜周孔  
何能為上蔡獵師妙小篆奴視俗體徒肥皮東封太山  
南入越大書深刻光陸離沙丘風腥人事變鬼饑族赤



誰嗟咨漢興萬事一掃去惟有篆刻餘型儀磨崖欽作  
不朽計其如歷數不及期蚩尤五兵紂漆器人物美惡  
寧相庇我雖過秦愛遺畫南山入望頻支頤不須嶧陽  
訪棗刻不用遷史觀雄辭虛堂默坐對此紙閉眼暗想  
君勿嗤要知秦碑沒字本却類周雅無辭詩

府師王公中秋宴客蓬萊閣分茶賞月于清白  
亭某以幕僚與焉坐上成二絕

使君開宴小蓬瀛幕客參陪亦與榮茗煮寒泉飲清白

酒斟佳月賞分明

白髮青衫老幕官  
蓬萊秋月兩年看  
興來端欲乘風去  
不怕瓊樓玉宇寒

又和趙仲永撫幹二首

冰輪飛出暮雲端  
更向蓬萊頂上看  
端似虹橋翫金餅  
絕勝華屋見銀盤  
光浮酒面杯尤滑  
清入詩腸句不寒  
又與鑑湖添勝事  
一時賓主盡鴛鴦

千巖競秀越王州  
地勝錢塘與虎丘  
龍卧半天頭吐月

鑑湖千里影涵樓宴開秋色平分際人在蓬壺最上頭

不負良天更輸我此中此夜兩年遊

去歲中秋與同僚賞月蓬萊閣今復

與府會舊遊諸公皆不在焉

再和

崢嶸高閣聳雲端萬壑千巖坐上看八百里湖寒鑑瑩  
二千年國卧龍盤金風吹面掃殘暑明月入懷生嫩寒  
見說神山正相偶醉中端欲駕仙鸞

家在東嘉山水州玉簫丹竈古仙丘兩年秋月登蓬閣

千里鄉心繞謝樓作賦端同北窓裏思歸長詠大刀頭  
與君何日脫塵鞅杖屨逍遙物外遊

又用看字韵酬趙仲永

紅蓮分幕忝同官秋月揚輝並席看句好湖山添秀氣  
談清齒頰帶微寒

故參政李公挽詩三首

光字太發

一代高明學三朝骨鯁臣淮南憚長孺楚國忌靈均死  
尚憂王室生寧問大鈞姜山同峴首千古淚行人

其比  
見潘

撫幹言公在謫所及垂死之際所言皆天下大事潘乃公之婿也

方面功尤著朝端氣最剛身能縛元濟城不陷睢陽忠奮少連笏耻同索盍堂永嘉瞻五馬遺愛可能忘

公在南荒日迹危名愈尊芝蘭坐竒禍瓜葛醞讒言斥去權臣力生還聖主恩衛公精爽在何用些招魂

九日與同官遊戒珠寺用去年韻

九日重登古戢山勞生又得片時閑菊花今歲殊不惡蓬鬢去年猶未斑藍水楚山詩興裏鑑湖秦望酒杯間

醉中同訪右軍迹題扇橋邊踏月還

顯仁皇后挽詞三首

代安撫王尚書

媯汭嬪天子塗山毓聖人  
聰明配昭獻慈儉繼宣仁  
湯沐寧私已園陵不病民  
鴻休耀彤管無復數城嫔

八帙年無憾三仁謚有輝

國朝仁宗皇帝宣仁皇后顯仁皇后凡三稱仁字

瑶

池燕仙侶寔石葬遺衣  
忽覩龍輜去猶疑駟馭歸  
聖情哀不盡淚向禹陵揮

代邸迎歸日炎圖喜中興  
解將天下養惟有聖人能方

慶朝長樂俄驚望獻陵寢園祇奉處擁紼淚垂膺

胡氏挽詩

婺女人嫁陳氏王尚書弟婦也王作墓誌

婺女生賢女端宜配德星登堂飲姑乳調膳教兒經子  
舍春猶盛孫枝葉已青韓碑紀遺懿彤管繼芳馨

次韻喻叔奇追感去冬天衣之游

去年同會類高陽蠟屐登臨雅興長可但山光向人好  
更欣天氣為吾良路經禹穴深懷白目對秦峯遠憶黃  
天衣在秦望山下按宋育對四皓黃公者乃越人也日線又添人正遠尺書千里

慰相望

次韻劉判官

大辨

見贈

篋藏詩墨尚澄鮮  
長記東嘉共綺筵  
游宦俱為蓮幕客  
異鄉重見菊花天  
謝池一別真成夢  
鑑水相逢似有緣

小小園林吾欲老  
看君功業上凌烟

劉丁丑在永嘉同郡燕即席作詞有

凌烟多少  
功業之句

趙仲永以御茗密雲龍薰衣香見贈仍惠小詩

次韻



天上人回餅賜龍香沾衣袖十分濃明珠照室光生豔  
三絕全勝萬石封

仲永再和三絕復和以酬

間世宗英學海龍交情猶為野人濃天香御茗分奇絕  
盡是慇懃手自封

手汲寒泉碾小龍天香一炷滿衣濃與君慷慨論時事  
欲吐丹心上實封

長記中秋踏卧龍尚餘詩興至今濃羨君豪邁如韓子

聯句猶容李正封

寄題周堯夫碧梧軒

鳳凰梧棲竹實食胡為使之在枳棘開軒種梧高幾尺  
鳳兮鳳兮聊爾息莫羨風微燕雀高一飛定展冲天翼  
覽輝瑞世鳴朝陽此梧長向人間碧

留別民事堂

二年宦東州民事了無補俯仰媿斯堂何以報明主故  
家簫峯下歸耕及春雨平生明畝心感慨聊自許

題雙峯資深堂

書生紙上誦糟粕釋子舌端談葛藤道在湛然方寸地  
不知深造有誰能

我到雙峯尋寶月為留一宿話資深但能造得儒宗語  
使是能傳佛隴心

雁山門戶此中入南北兩峯相對尖我與林泉有盟約  
問師覓取一峯潛

千峯已見見雙峯甌越山川在眼中吾祖吹簫定何所

會須乘鶴訪遺風

雙峯之西南  
亦有吹簫峯

堂名石刻兩俱存令我深懷舊長官學道資深更深處

居安能使庶民安

周開祖昔令樂清有遺  
愛堂名乃開祖所命

宿靈巖贈長老敏行

藍輿謝公嶺杖屨矩羅室淨名訪維摩一菴僅容膝尋  
僧畫屏中徃徃多八十平生看不足靈巖最奇絕老禪  
蜀中來心印傳佛日脚力窮天下稱此為第一茲山昔  
未開藏閉最深密倘不遇熙朝造物肯容出孫公賦天

台勝地尚遺佚我欲續金聲願借中山筆

梅溪後集卷四

欽定四庫全書薈要卷一萬五千八百六十一

集部

梅溪後集卷五

宋 王十朋 撰

詩

己卯臘月七日解官離越十九日至家明年正月二日被命除秘書省校書郎卜以八日行書二十字

梅花照歸眼春色戒行裝君命不俟駕安敢懷故鄉  
次韵馮員仲正字湖上有作

甌蜀異鄉客西湖同日看浪花隨去棹風絮逐歸鞍水  
浸吳天濶山涵佛界寬春光無限好共媿縛微官

次韵趙仲永悠然閣

越絕山川深更深不須登覽自來臨  
胷中丘壑忽相遇眼底塵埃無復侵  
得趣早同彭澤徑把杯時赴廣文襟  
知君指日歸天祿莫負平生閣上心

次韵皇子建王題明遠樓

百尺崇珠邸恩隆地更親  
壯侔巢鳳閣危切飲牛津  
眼

淨全無礙心明自不塵登高宜暇日為善及良辰炳煥  
瞻宸畫沉潛味道真

樓中藏所  
賜御書

書中端得趣筆下已如

神語帶江山好名隨棟宇新應憐天下士蝸舍不容身

### 劉韶美辭試館職

學問稱博洽向後無此劉太乙然青藜遲君天祿游給  
札試玉堂故事久不修遴選先實才聞之輒掉頭我迺  
行祕書肯隨鈎繫流三日掃虛室佇想心悠悠張羅君  
不顧竊食吾懷羞西風吹蒹葭倚玉嗟無由



再用前韵贈韶美

平生少相識，摸索能記劉。東南小蓬萊，二年同宦游。濯  
纓鑑湖水，佩蘭以潔修。自倚骭髀門，不撼富貴頭。西泛  
吳江濶，委身謾乘流。回首望故鄉，天高路遐悠。慷慨君  
自喜，伊優吾亦羞。乘桴倘有志，願言呼仲由。

次韵韶美送劉夷叔二詩

時夷叔已死

蜀山高岩岩，英物世非少。青藜卯金子，高步絕雲杪。思  
苦鳴輒悲，詞深誼難曉。知音有古人，紙上自傾倒。我昔

賢關游相逢粲衣表東歸拜言贈篋笥至今好重來已  
鬼錄魂魄蜀天渺蓬山訪高躅空舍不停繞定尋窮孟  
郊相酬類雙鳥莫作人間來世路轉難拗

右悼夷叔

西南有佳士岷峨秀胸中標高語更妙寫出岷峨容青  
天道路難冥冥慕蜚鴻翩然下人間海濶洪濤春尋幽  
入禹穴杖屨誰相從萬卷蟠腹笥一榻眠禪叢時來訪  
予語自媿賢非戎世態冷處薄交情淡中濃去歲鑑湖

別分甘老巖松行藏果誰使離合情無窮田園有深約  
耘耔當自充異時甌蜀間林下見兩翁

右贈韶美

皇子建王生日

十月二十日

黃花過後梅花前雲披愛日烘青天月良陰剝陽欲旋  
冀餘八莢時半千鬱蔥佳氣燭星躔帝子來從天日  
邊淑質岐嶷貌端然少親師傳學問專六籍奧旨能心  
傳百家諸司咸窮研餘事翰墨工詩篇平居為善心拳

拳君親忠孝尤兩全放遠聲色塵管絃明窓自結賢聖  
緣吾皇知子能擇賢斷自宸衷愛不牽九重一日丹詔  
宣歡聲喜氣溢幅員願王自愛思無愆仰佩天眷奉周  
旋保持王體如臨淵日親端士遠佞便紙上興衰鑒古  
先誕宸朱邸錫珖筵鼎來福祿方綿綿不須丹竈求神  
仙不用貝葉慕真詮誠存性盡萬善圓身與國壽俱千  
年

寄新厯日與夢齡昌齡弟

老去驚看歷日新  
宦情尤憶故園春  
吾鄉親舊如相問  
為道明年已五旬

送查元章二首

聖主德寬大小臣  
言激昂敵情殊未測  
淮甸可無防直氣  
思開日寒威誤墮  
霜芳姿等蘭蕙摧  
折更芬香

肝腦不自愛精忠  
為上殫危言犯顏  
易直道立身難去  
國名逾重還家迹  
始安相將吾亦去  
林下掛衣冠

祕書省後園修竹可愛胡正字

憲

有詩次韵

不俗更嫌俗風枝時拂牆青青映藜燭細細雜芸香勁  
節老方見清陰寒欲藏蕭疎似吾輩味向靜中長

魏邦式通判挽詞

挺挺魏公後重聞別乘賢有時同正觀無地上凌烟雨  
足嘉禾穗風清婺女蓮吟魂招不返遺恨越江邊

耆舊嗟零落公年又不長雙旌空入夢半刺橫罹殃子  
舍三珠秀吾鄉一鑑亡平生可書字椽筆有星郎

張郎中大

猷作  
行狀

次韵程泰之正字雪中五絕

幻玉蜚花濕帝城  
蓬萊燈火冷中清  
人間草木舊相識  
傾刻還驚面目生

栖鳥驚起天無月  
化鶴歸來頂不朱  
錯認湖山作西子  
眩人疑是玉肌膚

點綴工夫巧更奇  
崑崙玉果半歲蕤  
嗅梅咀雪欲腸斷

况讀高生人日詩

人日雪

預知禾麥定登場  
六出攬先瑞衆芳  
更喜江梅自蕭洒

不緣摧壓減清香

卧聞征雁作回音遙想吾廬玉滿林乘興扁舟定歸去  
草堂深處伴猿吟

泰之用歐蘇穎中故事再作五絕勉強繼韵

君詩雅勝五言城白雪篇章分外清不許同僚持寸鐵  
筆尖戰退老書生

寒侵睡思那成夢酒著衰顏誤抹朱待詔先生應怯冷  
餐氈使者可稱膚



穀精蜚處人為日水鑑頒時律應藎照耀元宵更盈尺  
不容燈火占新詩

煮海神功不計場逼真冷焰奪春芳東君深恐成堆積  
急遣雷公喚阿香

夜靜微聞折竹音驚禽何處更投林寒生習氣無繇掃  
遙對湖山忍凍吟

趙仲永和東坡汝陰雪詩并舉趙德麟賑濟故  
事見示遂次其韵

不作秦人視越人，深憐里舍甌生塵。  
恨無廣廈容寒士，安得洪爐煖曲身。  
草木照人俱有艷，珠璣滿地不憂貧。  
憑誰扶取浮雲破，莫待功成始放春。

介甫詩功成終欲放春回

次韵洪景廬編修省中紅梅

不為怕寒貪睡遲，東君妙意端可知。  
雪英零落眼界寂，放此孤瘦紅南枝。  
蓬萊更向逸遠地，

園在著廷後

草木寧有

天饒姿，冰容戲作桃杏色。  
醉臉雅與神仙宜，江兄蠟友已前輩。  
黃生後出非同時，丹心獨與勁節侶。  
疎影共浸

清漣漪騷人相顧最不惡何用車馬紛蚩蚩典衣莫惜  
共携酒對華一展思鄉眉

李德遠寺簿敢言勇退今之古人也東嘉王某  
賦詩以高其行

吳山蒼蒼烟靄橫皇都日日春風生利塗徃徑走輪轂  
古道荆棘惟君行吳江洪濤拍天泐萬楫千帆日相踵  
六鰲入釣猶不歸急流知退惟君勇斜川勝事今臨川  
錦袍風月追謫仙芋魁豆飯吾亦有脫屣有媿君翩然

我輩情鍾惜離索為國惜賢情更惡江頭送別春尚寒  
回首冥鴻已寥廓

省中黃梅盛開同舍命予賦詩戲成四韵

照眼非梅亦非菊千葉繁英刻琮玉色含天苑鵝兒黃  
影蘸瀛波鴨頭綠日烘喜氣光燭鬚雨洗道裝鮮映肉  
此梅開後更無梅莫惜攀條飲醪醕

送王嘉叟編修

上書薦張和公  
請外得洪倅

上書請劔人未復

胡邦行昔亦以  
密院編修上書

開口薦賢君又行堂

上伊優笑絕倒紛紛去國皆狂生搢紳敢言似慶厯風  
俗漸美如東京手揩老眼看除目一遷一去知誰榮南  
昌別駕亦不惡三王高閣尋宗盟吳江漫漫楚天闊羨  
君一葉春舟輕

送陳阜卿出守吳興

自察院遷郎  
未幾得外

臺閣輟名士符竹分帝憂搢紳有清議欲為朝端留才  
名四十年骭髀成白頭方開公道口遽中讒人鉤觸邪  
孤壯志歛惠施一州命義二大戒能言亦能由

阜卿嘗  
作命義

天下之大戒論  
學者至今傳誦

去矣雲水清孰障天下流願言如季路

乘桴共公浮

次韵程泰之酴醾

青春果作堂堂去啼鳥喚春春不住明珠萬顆玉為錢  
欲買風光嗟已莫蓬山地冷花木稀祇有寒梅已先雨  
誰遣虬枝上高架稍覺雲陰覆行路雨餘景物猶未佳  
葉底精神不多露鼻觀疑聞班馬香姿比何郎更風度  
平生惜春如惜別老眼待花如待哺幽亭相對止三人

草草杯盤為花具

時同舍考試惟泰之負仲某在館

送胡正字

憲

分韵得來字

胡上書言事得祠還鄉同賦者七人以先

生早賦歸去來為韵

武夷之山高崔嵬武夷先生賢矣哉山中高卧似孤竹

顏蒼節勁清無埃吾君養老過西伯不遠千里歸乎來

胸中萬卷可醫國首薦廊廟真人才

胡上書薦張和公

人言朝

奏暮必逐天顏獨為忠言開崇文三館不浪闢端為天  
下收奇瓌平時論議即涵養富貴豈以三緘媒西京老

儒作符命蒼黃投閣良可哀何如皇朝有歐范開口不

憚干霆雷

文忠文正二公皆以館職言事

先生學力到前輩一時盛事

光麟臺宸衷宵旰急忠讜佇觀前席延鄒枚先生掉頭  
竟不住扁舟自載高風回道山游從盡英雋顧我晚進  
寧容陪梅花滿枝柳弄色賦詩送別同銜杯吾廬三徑  
亦荒草松菊怪我何遲徊

四月四日祀赤帝于慈雲嶺淨名寺祀畢游易

安齋至江次送黃子升通判還鄉



祀罷燈花喜山游曉色新江頭送歸客我亦是行人

送太學生徐易歸天台

天台古仙山藥物固非一采之年可延厥品惟參朮茲  
誠籠中物不可亡一日良醫苟能用可治天下疾

章季子教授惠顧渚茶報以宣城筆戲成三絕  
春回顧渚雪芽生香味尤宜祕水亭搜我枯腸欠書卷  
飲君清德賴詩情

白齒新芽不出山青囊誰遣到人間午窓驚覺還鄉夢

紗帽籠頭捧兔班

季子以青囊紗盛二兩云乃真顧渚零陵佩不出山絕品也

雲水書來寄葉嘉中山人去代瓊華定將絳帳鑄人手  
散山毫端千種花

趙仲永和胡正字竹詩見贈用韵以酬

憶昔游蓮幕獲登君子墻蓬萊醉秋月龍鳳啜天香臺  
閣子將集山林予欲藏新詩似修竹風味更高長

張閣學挽詞

宗元

南渡已三紀衣冠今幾存傷心失遺老回首慨中原去

國權臣力全軀聖主恩致君堯舜術妙意託空言

公嘗解  
二典

公在南昌日含沙禍竒語蜚無限謗獄具不過詩  
天道何嘗遠人心自太危蓋棺公論定盛德合豐碑

寶月師刻予舊題以寄因書二絕

資深堂上偶留題多謝高僧不掃泥更與慇懃琢山骨  
惡詩傳到浙江西

冊府經年已倦游夢魂隨雁到峯頭山中老宿如相問  
為道歸期不待秋

五月十八日去國明日宿富陽廟山懷館中同舍

去國懷明主離羣念舊游  
翻令到家夢終夜繞瀛洲

寄馮員仲

相見惟言去吾今去已成著鞭先幾日不及送君行

釣臺

漢高嫚罵四皓隱周武干戈伯夷餓南陽故人幸無失  
先生胡為亦高卧清風却在夷皓上千古真能激貧懦

客星夜向釣灘明想像年時臨帝座

嚴州龍門院滿散天申節

棹弭龍門下誠馳天闕邊平生明畝意祝聖更惓惓

宿永康縣黃塘店觀稼有感

路入黃塘喜更疑地名雖是里閭非

予家之東十里地名亦曰黃塘眼

中禾稼已如許薄有田園宜早歸

永康有嶺名花錦被

要將山水替埃塵六月還家不憚辛炎暑厭聞花錦被

清涼宜近竹夫人

舟中偶題

綠水客星瀨薰風嫠女谿來尋處士隱歸向斗中棲

游石門洞

雁山飽見兩龍湫洗眼新觀石洞流欲向故鄉尋白鹿

先來仙隱訪青牛

青牛道士  
隱于石門

破荒喜誦劉郎句躋險思

從謝客游天下林泉看未足分將身世早休休

林明仲自梅嶼拏舟招丁道濟道揆張思豫及

予同飲索詩坐間成六絕七月朔日

君家梅嶼我梅溪一笑相逢郡治西

明仲別館在城西予假之踰月要

使衆山同對酒芰荷香裏具親携

右贈明仲

塘餘春草遙思謝樓面蒼陂重憶劉

時泊舟思遠樓下楊播詩云吳興劉

孝叔樓北

人昔共游今孰在蘆花飛雪上吾頭

予昔游泮宮與

同舍泛舟有共乘小艇穿蘆花句今二紀矣訪舊多在鬼錄而予已老慨然傷懷

右懷舊游

五人二百六十五尊酒相逢非偶然把手共為他日約

莫緣富貴負林泉

時仲明五十六道濟五十四道  
揆五十三思豫五十二予五十

右贈諸公

遙岑出碧明雙目境入韓詩已飽參湖上軒窓對遙碧  
新詩寫出舊城南

地環碧玉軒窓瑩舟入紅雲笑語香下筆慚無少陵句

老懷徒愛宋公莊

宋侍郎別業在思遠樓之南有軒名遙碧

右題宋莊



西岑風物冠吾鄉十里烟波興味長不用扁舟鑑湖去  
餘生甘向此徜徉

右題西岑

梅溪後集卷五



總校官庶吉士臣侍朝

校對官中書臣金光悌

謄錄監生臣陳東亭

謄錄監生臣黃廷璧

欽定四庫全書薈要

集部

梅溪後集卷六

七

詳校官助教臣謝登雋



欽定四庫全書薈要卷一萬五千八百六十二集部

梅溪後集卷六

宋 王十朋 撰

詩

次韵昌齡至樂齋讀書

端慕顏回樂真同陋巷居息心容膝地得趣滿牀書  
短燈宵永窓明日晷舒相看有修竹心為主人虛

寶印叔示詩且索碑刻以南明山六大字為獻

紫芝巖  
隱岳巖 仍次韵

不才詎可登臺省早問君王覓閒冷聊尋商嶺綺與園  
未羨雲臺冠并耿掛碑滿屋寧療飢來詩云滿屋掛碑光耿耿嗜好  
與叔真相宜試寄南明六大字想像年少西游時

寶印叔辯上人各贈瑞香花

小小園林意自憐

全用劉汝一校書送行詩一句

名花十八擬唐賢瑞

香一種來潛澗學士新添兩少年

曹夢良自許峯來訪留山間數日賦詩數十章

復出四絕見贈次韵

徑荒猶有淵明菊囊澁寧求季子金老矣此身何處著  
入山惟恐未能深

謾有忠懷徒耿耿恨無長策掾元元張儀舌在知何用  
莫莫休休且勿言

平生風義慕相如筆硯從游二紀餘直許交情定金石  
肯同餘耳但光初

與君連夕燈前語勝讀十年窓下書八斗文章千里足  
未應低首掾桐廬

先人舊題東山墓亭三絕

入堂無復見雙親建

此字元犯御名故易之

此來寧似在神天地

深恩難以報含悲唯有淚霑巾

門枕青山戶傍谿青山流水助悽悽雙親既遠神何在  
對此追思獨怨啼

新築茅廬澗壑園山光水色共依依野人不為閒中趣  
誰會朝來與暮歸

某辛巳秋歸自武林省先隴遂修亭宇濬溪流

因思先人舊詩已隨屋壁壞矣尚能記憶遂追和

殘生無計可榮親一見松楸一損神惟有青山知此意  
晨昏長戴白雲巾

先隴在家之東山山最高白雲常抹其頂

重葺山亭濬舊溪杖藜來往獨悲悽追思四十年間事  
風為哀號鳥為啼

丘木森森已十圍滿林清蔭可棲依每憂樵牧傷松柏  
游宦三年兩度歸



送萬先之赴清湘教官

早歲聲名滿上庠青衫今始赴清湘得官已晚豈宜冷  
行路正難那更長平昔心期良不淺異時官業可能量  
鵬程九萬從今日行見飛飛到帝旁

送曹夢良赴桐廬戶掾

年少論交老愈堅交情盡在和韓篇短檠業共賢闕舍  
淡墨名同桂籍年筮仕暫為三語掾摘詞行踐八花磚

許峯佳識亦聊耳何止蓬萊山上仙

瑞安有許峯坵  
斷秘丞歸之識

鷄黍相尋豈偶然論文尊酒荷留連  
秋風初送雁羣至喬木喜聞鶯友遷  
勸我鑑湖行甚力送君釣瀨去無緣  
願將清白師韓范從此高堂有四賢

需次家鄉五載遲便便腹笥愈添圍  
才如子建豈論斗性類西門能佩韋  
車馬戒塗君欲去田園迷徑我初歸  
男兒所尚惟名節莫墮人間富貴機

十月朔日偶書

去年此日對清光聖德能容一介狂  
言畧施行非不遇

身雖疎外亦何妨

剪拂花木戲成二絕

洒掃衡茅端欲老  
剪裁花木自為春  
權門炙手非吾事  
祇合丘園作散人

蔓草芟夷莫許侵  
好花封植待成陰  
每於小小園林裏  
長抱惓惓畝心

小小園十月杜鵑花  
盛開有共蒂雙頭之異  
因以數語記之

一聲杜宇啼春風明朝緋掛千山叢歲寒此色豈易得  
那更朶朶雙頭紅共蒂聯芳友于愛一吐一含分次第  
造物私我小園林此花大勝金腰帶

牡丹中有名  
金腰帶者

### 題月師桂堂

道人以月名身以桂名堂胸中負所有志在丹霄旁冠  
巾倘可加唾手得天香惜哉已世外此志終莫償山中  
作堂侔月窟禪定吟餘思清越要令坐上生清風須使  
心中似明月

十一月二日自金谿訪錢用章于白石覽山川  
景物之奇以東道之姓為韵

朝離文君故宅邊莫尋謝守舊行田黃羊先示神仙迹  
湖上興有黃羊巖白石俄開洞府天兩派崢嶸鳴玉澗一聲欸

乃釣魚船王孫占得湖山勝明月清風不計錢

同錢用明用章游白石巖

謝公好山水得郡古東甌造物惜佳境雅志多不酬松  
蘿蔽雁蕩烟靄埋龍湫行田徑白石不到仙山頭寥寥

數百年天付黃冠流巍然萬仞崖壁立東南州誰將補  
天手化出白玉樓兩龕藏洞府中有羣仙游上通尺五  
天下接三神洲飛泉落巖腰碧澗鳴山陬羣峯真培塿  
滄海為渠溝隘視人間世萬象同蜉蝣我家雁山陽崎  
嶇厭經丘翩翩錢公子呼我尋巖幽初驚小雨密忽掃  
羣陰浮杖屨窮巔岼一洗塵埃眸山林有真樂富貴何  
足求但願乞二山不願萬戶侯

二山白石  
雁蕩

又書巖上

十里湖山翠黛橫兩溪寒玉闌琮琤路從飛鳥上頭過  
人在白雲高處行巖下行田謝康樂洞中辟穀李先生  
凭欄不瞰人間世轉覺此心名利輕

屑玉泉

白石巖霄屑玉泉佳名初自長官傳渾疑齒頰冰霜論

終日霏霏落半天

周開祖名是泉曰屑玉東坡有贈周詩云詩成錦綉開腸胃論極冰霜繞

齒牙

李少和像

少和辛苦學飛仙遺像今猶在洞天都似先生能辟穀  
何須太守為行田

游東際

白石三峯下懸崖七際流穿雲來汨汨朝海去悠悠石

是誰家婦

有兩石峭立俗呼石新婦

龍居第幾湫

俗云舊有龍

平生不行

險到此即回頭

上有六際畏險不登

次韵寶印叔觀海三絕

載地浮天浩莫窮氣營樓閣聳虛空道人妙得觀瀾術



萬里滄溟碧眼中

榴嶼何年改玉環

木榴嶼一名石榴嶼俗傳避錢王諱故改名玉環

望中猶是

舊青山遺民不記當時事惟有潮聲日往還

誤入蓬萊朝未央至今魂夢記微茫扁舟欲効鴟夷子  
遙望滄波興已狂

李鎮夫闢圃築堂效孟氏之養吾表兄杖屨其

間得日涉之趣某來游名堂曰雙植因書三絕

不到君家幾換春眼中風物一番新吾園小小知何用

不似茲園可養親

琴書得趣有真樂  
軒冕倘來何足干  
種德種花兼著力  
要須留與子孫看

繞堂花木隨宜種  
堆案文書取次翻  
我待衣冠掛林下  
杖藜時復到君園

劉長方自豫章寄書稱茗焦蠓房之美恨未知  
味書一絕以寄之

珠嶼小蠓圓帶石  
茗焦巨房深若盃  
吾鄉此味亦不惡

故人游宦盡歸來

若焦在沙角海中本曰奴焦予易之曰若珠嶼在大芙蓉小蠓絕佳

寶印叔得小假山以長篇模寫進士欽逢辰和

之某次韵并簡欽

越絕天台溫雁蕩萬壑千巖各形狀錢塘風物更奇絕

杖屨年時記曾訪歸來戲闢小園林十里西湖藏甕盎

予嘗以甕植蓮有詞云一盤池地十里西湖是

悠然入眼皆吾山羅列軒窓一

何壯止菴道人真有道種竹蒔花近丘壑何人好事贈

假山潛澗新添小屏幃却疑遷徙從平泉更恐飛來自

秦望

秦望有飛來山飛來石

世間賈物何止此沙佛儒衣龍亦象

道人於物意豈留異日從教散天壤花木篇章兩遊戲  
林下高風真可尚來游蓮社有詩人句比昌黎更豪放  
我休說假復論真真假通通歸一相

### 次韵昌齡西園十詠

黃楊

予歸自武林黃楊梢枯命工去藤蔓苔蘚復有生意

黃楊庚甲與吾同樹已蕭疎我亦翁  
藤蔓稍除苔蘚去  
歲寒猶解傲霜風

葡萄

滿架龍鬚卷復伸  
堆盤馬乳釀青春  
潑醅一斗宜延客  
莫博涼州學漢人

脩竹

至樂齋西碧玉竿  
清陰時過酒杯寒  
明年看長纖纖筍  
解籜當為漢帝冠

梅

拂雲修竹遶吾家  
竹裏仍栽第一花  
好句更同林處士

月黃昏後影橫斜

桃

欲留王母盤中核兼採秦人洞裏薪  
此事渺茫花笑我不如聊賞故園春

李

長念詩人詠子嗟團欒繞樹日歌斜  
冰盤行薦炎天實不用東門學種瓜

杉

記得先人手自栽森然千尺盡成材翠絲結作思人樹  
它日兒孫豈忍摧

桂

丹霄休歎路難通學取燕山種桂叢異日天香滿亭院  
吾廬當似廣寒宮

柳

何幸先人有弊廬不妨同種柳千株垂陰覆地寧無日  
作雪漫天肯似榆

菊

百花春放菊秋榮  
霜裏鮮鮮照眼明  
歲晚不妨開自好  
何須三嗅泣繁英

題如存亭壁

十二月五日  
同二弟省墳

不見慈親已一星  
佳城松柏慘然青  
此生難報劬勞德  
空對銘碑涕泗零

年來游宦遠松楸  
越雪吳霜帶滿頭  
乞得祠宮養衰病  
白巖香火共僧修



劉義夫欲與先隴植蘭寄數根

思親何忍陟南陔  
采得幽蘭祇自哀  
寄與東山劉孝子  
佳城側畔好親栽

義夫許贈丁香蠟梅

劉郎不獨種桃花  
蠟蘂柔香更可嘉  
臭味相同林下友  
從今花木亦通家

予植十八香丁香曰柔  
香取杜詩丁香體柔弱

義夫以趙清獻諫垣集易柳文次其韵

文集何須較少多有無  
相易共漸磨憲臺清獻  
柳州柳

唐宋人才未易過

雁山僧景暹求文記本覺殿

歸來欲効老夫潛喜見游方舊杜暹  
本覺殿成功德滿  
媿無筆力助莊嚴

又六言

筆下何曾有口囊中更媿無  
錢聊把一言讚歎助成此  
段因緣

書不欺室

室明室暗兩何疑  
方寸長存不可欺  
勿謂天高鬼神遠  
要須先畏自家知

人日有雪竹間種蘭

人日又飛雪

去年人日  
臨安大雪

竹林仍種蘭

舊嘗於竹  
間種蘭

陽浮屑

瓊玖風泛馥檀欒  
花點黃金勝叢依  
碧玉竿世間桃李  
眼肯向此中看

張思豫主簿送丹桂蠟梅

通家天上張公子  
桂種遙分月窟香  
三徑慇懃自栽植

異時會見五枝芳

蓮幕何人送此花不容一藥污貧家歸來自覓清河種

馨德如人最可嘉

予在越幕有送蠟梅者卻之同僚有蓮幕風清不受梅句

余全之贈菊栽二十品并示三十絕走筆二絕

酌之

老覺山林興味長歸來三徑歎荒涼分君嘉菊二十品  
增我東園十八香

余郎蕭洒似何郎事業它年未易量寄我新詩三十絕

筆頭直與菊爭芳

二月二日焚黃天色開霽賓游並集存沒有光  
悲痛之餘因成鄙語

三釜深悲不逮親  
九天命下賁雙墳  
痛將淚雜香醪奠  
忍見衣隨告墨焚  
漠漠濃陰初閣雨  
暉暉煖日旋披雲  
餘生難報劬勞德  
猶有孤忠可報君

送陳元佐游剡

杖屨昔游剡夢魂猶至今  
欣聞戒行李遙訪舊同襟  
數

學功相半淵源力可尋池中神鯉足時為寄鄉音

雙桂

先人於井之兩旁植雙桂不知其幾年矣木陰茂盛  
香聞遠近某偶得一石立為墻角書雙桂二字以識  
之因成小詩以懷遺德并示子弟壬午閏月十六日  
先人植雙桂馨德滿吾廬不老兒孫長聯芳合似渠

東籬

我豈覘彭澤茲籬偶在東悠然見山處仍向菊花叢

左原詩三十二首并序

樂清之東三十有五里羣山環繞地名左原以其居  
邑之左也中有左嶺左湖左口皆以左名之予七世  
祖自杭徙溫家于是原地雖荒僻有山水足以自娛  
予丐祠得請日與兄弟隣里有杖屨登臨之適原中  
景物可資賦詠者各識以詩凡三十二首壬午三月

東高山

左原有四高山在乙辛丁癸之位衍  
者目為四貴人東山最高上有五峰

其一曰宋  
家尖也

峯頭日出已停午山半雲橫疑在天要使名如越山重

直須人似謝公賢

越之上虞有東山乃謝安石高卧處

西高山

西高山者數峯稠疊前山如几俗謂西山平最高處謂之杜鵑花尖西山

峯巒最多術者謂之旌節山

壓頂花枝紅欲燎導前旌節開如訶倚窓拄頰時時好  
何止朝來爽氣多

南高山

山在縣治東北俗呼縣後山夜聞更鼓聲間有地名小雁蕩

山後風來聞縣鼓蕩中秋至集賓鴻我歸種菊東籬下



長在悠然眼界中

北高山

子家之後山也左原之山惟此山最奇秀翼然如翔舞狀上有尖峯

羣山如圍秀回環秀拔羣山是北山我恐山中猿鶴怨  
移文未至已先還

龜山

俗呼黃嶼術者謂真得龜形

衆山環遶一山橫形似真龜勢欲行不向九江資納錫  
臨溪曳尾自全生

卧虎山

在原之水口形如卧虎舊有淫祠俗呼廟山

昂然虎踞一原東回首耽耽氣象雄不放衆山隨逝水  
溪頭高卧自威風

梅溪

在北高山之陽去孝感井二十步溪至小以井為原予家其北溪之南有水如

帶通謂之梅溪溪名舊矣莫知所自予植梅以實之

我向梅花溪上家幾看清淺浸橫斜手栽木已如人老  
雪髯蕭疎對雪花

楊谿

梅溪東流四十五步合原中數水而為楊溪溪稍大楊氏世居焉故以姓得名

一澗泓澄會衆流肱分俄類娶溪頭

辛巳秋水分為二

臨溪更

種青青木故事端同柳柳州

戲綵巖

原之西山有巖如屏上有尖峯俗曰白巖然巖色爛斑如施五采故以戲

綵易之

烟霞屏障列西岑戲綵標名始自今我過巖前每流涕  
斑衣空有老萊心

杜鵑巖

在戲綵巖之東巖頂稍平上多杜鵑花故以花得名予家寒食九日必登是巖

游宦三年樂事違巖花笑我鳥催歸歸來又被巖花笑

笑我登巖何太稀

杜鵑花一名巖笑予還家將一載竟未登巖

碁盤巖

杜鵑巖之北

杜鵑巖北一拳石石面平平堪弈碁路僻山深罕人到  
爛柯仙客未應知

撒水巖

在戲綵巖之北

龍卧靈湫志未伸時時噴水撒行人雖然未救蒼生旱  
聊欲澄清世上塵

松羅巖

在原之西北有山隅之四面壁立可梯而登上平北有水可汲能容數百

人產松羅木因以得名建炎間有謀避難是巖者予嘗往觀之非活路也

挿天萬仞絕攀躋巖頂松羅不是栽廊廟須材作梁棟  
人間斤斧可能來

障巖

在戲綵巖之北壁立如障其色青黑有石方而直聳而有稜長者數尺可植庭宇間

巖如法吏面清冷石似端人真直方誰解移茲障邊境  
敵人安敢肆猖狂

人面巖

在原之西

看盡人間古與今蒼顏一任蘚苔侵豈惟有面如人面  
更喜無心似獸心

天柱巖

有二一在三井之北  
一在松羅巖之側

雁山一柱插雲霄三井松羅柱亦高蓬華深懷杞人念  
擎天端賴柱堅牢

幞頭巖

在原之西北地  
名烏石頭田間

開處身宜及早抽山林遲我掛冠游不須花裏尋腰帶  
且向田間置幞頭

宋家尖

在東  
高山

皇恩西被復東漸四海蒼生盡仰瞻畎畝微臣尤戴宋

結廬長向此峯尖

小雁蕩

在原之南山以雁得名  
曰小者以別大雁蕩

歸雁行飛集澗阿不貪江海稻梁多峯頭一蕩雖然小  
飲啄猶堪避網羅

左嶺

在原之南山

北望吾廬山最好南通蕭寺境逾幽  
嶺之東南有明慶院白雲夜  
向原中宿幾度隨人過嶺頭

左湖

在原之東又東曰湖邊

漁樵歎乃日相呼舟楫生涯在畫圖我與漁樵同隱逸  
不須乞作自家湖

萼湖

在楊溪之南吾鄉無萼菜  
獨此有之此詩乃舊日作

水晶銀線滿湖中

先人詩云莖抽銀  
線細根結水晶寒

遙與吳江氣象同

我輩他年厭游宦思歸應不待秋風

南瀑布

在南山之下  
上接小雁蕩

飛瀑來從小雁蕩靈源頗類大龍湫矩羅尊者不須占

乞與山翁取次游



北瀑布

在原之西北山腰間俗名主潭

茲潭誰主復誰賓清世寧容有隱淪獨我山林養衰病不妨來作主潭人

嘶水澗

原之南有左嶺水北流入于原中水善嘶晴而嘶則雨雨嘶則霽水忽鳴

忽止曰嘶

嶺頭寒澗遠無聲夜靜風恬忽自鳴山水有靈人不識老農常用卜陰晴

雁潭

原之西南三井山之下吾先人九日嘗集賓朋于此因命是名

九日登臨澗水濱蕩中征雁亦來賓如今雁至應相感  
不見名潭舊主人

三井

原之西南山路崖險人迹罕到于宣和辛丑春從先祖人避寇是山凡三宿

見溪潭多游魚俗傳井舊有龍

源泉高似銀河落石井泓然鼎足分聞說井中龍已化  
定從三級上青雲

孝感井

予家有井稍大俗稱大井王家宣和壬寅秋先祖有疾思鯽魚時暑不可

致先人釣于井而得之井素無魚蓋孝感也張大猷秘書挽先人詩云玄鯽隨鉤談養親

張後為工  
部尚書

綸竿臨井重欵欵誠感幽潛遂獲魚解道隨鉤得玄鯽  
秘書好句實堪書

白巖庵

在白巖之東吾祖捨山歸明慶院而  
立是菴四山環合形如蟠龍前到南

高山形  
如舞鳳

飛鳳吹歸思竹實

庵山  
多竹

蟠龍高卧戀山泉吾家松檟今

三世僧舍鍾魚已百年

吾高祖母葬庵之虎山晉曾祖  
葬于青龍首曾祖母葬于庵前

平地先妣葬  
于庵後山

賈公庵

在南高山之下司理賈公葬其母兄嫂于此築庵命僧守之賈公名如規

字元範

賈公名德重吾鄉慈母難兄寔此崗手種松楸及因果  
青山流水共高長

如在亭

先人葬大父母于東山立亭以表之有詩云入堂無復見雙親建此來寧

似在神先人附葬其側某名其亭曰如在采詩中語也

東山一到一霑巾記得先人昔念親  
松悲柏慘見無因把茲亭號如在

如存亭

先妣墳亭  
在白巖菴

北堂猶綠舊時萱  
寒暑無繇復清溫  
戲綵巖邊白雲下  
慈顏彷彿尚如存

小小園納涼

屏迹丘園世事輕  
澹然滋味似孤僧  
平生願學昌黎伯  
宰相三書獨不能

贈甥萬膺

詩書為田筆硯耕  
著意治此清白生  
它年門戶大可必

東平有孫吾有甥

萬孝傑用韵見寄酬之

堂有慈親養且耕游從毛穎楮先生新詩寄我尤清絕

深喜牢之有外甥

孝傑劉氏甥也

題從姪

御名

莊

風雨漂我廬無地寄食宿小阮知所敦舍我道旁屋震

凌得幘幪幸免泥塗辱明日歸舊巢鷦鷯一枝足

壬午秋七

月戊申大風飛屋拔木予先人敝廬兩廡催壓來寓是莊凡兩旬以八月己已還舍書于莊壁

萬孝全惠小龍團

貢餘龍餅非常品絕勝盧仝得月團  
豈有詩情可嘗此荷君分貺及簾官

梅溪後集卷六

欽定四庫全書薈要卷一萬五千八百六十三

集部

梅溪後集卷七

宋 王十朋 撰

詩

赴召

壬午六月十一日今上受禪二十一日有旨除臣某知嚴州九月二十一日召赴行

在

聖主龍飛纔十日微臣得郡古嚴陵詔書又趣歸天闕  
願竭孤忠贊中興

曹夢良贈炭戲成一絕

予時為郎夢良為嚴州司戶



烏龍書至送烏薪郎舍嚴冬覺有春未暇吞為啞口漢  
且須煖作直身人

宿學呈同官

時為司業  
宿學私試

不聽梧桐雨回頭已六年  
齏鹽諳舊味燈火結前緣  
進學思韓愈同襟有鄭虔  
諸生不待勸忠孝素惓惓

某去五月罷館職還鄉塗中以詩寄同舍云去  
國懷明主離羣念舊游  
翻令到家夢中夜繞瀛洲  
今以史職復至道山訪舊或遷或去惟後園

修竹乃故人也感歎良久因成短篇

蓬萊隔弱水三年兩來游羣仙各何之  
翩然蛻神洲園中舊擇龍勁節含清幽  
手摘歲寒葉恍惚乘歸舟

馮員仲赴闕奏事士君子咸欲其留聞為魏公所辟勢不可奪遂成鄙語兼簡查元章

名德重夷夏皇朝兩魏公平淮已得愈論將更資馮報

主男兒志知恩國士風盡收良馬去冀北遂羣空

予嘗以書

寄馮云聞元章為魏公所知裴度幕中得韓退之賊不足平矣元章時為機宜員仲為江西運判台來奏事

程泰之郎中以詩三絕覓省中梅花因次其韵  
長記蓬山舊賞梅芳樽一笑共君開重游未見梅花面  
應誤君詩得得來

詩似西湖處士詩十篇三絕闢清奇更將正味森嚴句  
壓倒屋簷斜入枝

程未篇云花中結子酸連骨正味森嚴衆苦之待得和羹渠自會如今莫

管欲  
人眉

竹亭不到幾經時來往逢梅似退之遙想吾廬溪上好  
十分鄉思又關眉

胡秘監贈詩一絕

司業口占絕句奇甚銓輒用韻和呈効吳體

南山舊說王隱者北斗今看韓退之不須覓句花照  
眼行見調羹酸著枝

某依韻奉酬

平生恨未識剛者今日豈期親見之欲把江梅比孤潔

江梅無此歲寒枝

時胡文同館中諸公見訪因留小酌  
予舉和程泰之梅詩壓到屋簷斜入

枝句胡頗稱賞  
和枝字韻以贈

胡秘監醑醑詩

銓携具賞石渠醑醑用坡韻呈同舍

醑醑獨殿春得路未為晚露葉張翠繖月藥明玉幘  
洗粧雨亦妍暗麝風更遠唐時真宰相勁氣凌諫苑  
危言工切劘壁立萬仞巖帝為釀此花以賞碩畫婉  
清芬濯千古天河豈須挽不妨便醉死聞香定魂返

唐憲宗以李絳直言賜醑  
醑酒未若此集真醑醑也

某次韻

秘監携具道山集羣仙賞醑醑和東坡詩真雅會也  
某偶以私試鎖宿不與遂次其韻

紅紫紛爭先醑醑分甘晚誰裁羣玉府童童翠張幃華  
共芬芸香韻隨官逸遠

館中醑醑在著廷之後著作即號逸遠官

奚用燃青

藜端能照書苑先生海上歸平步到蓬巘招邀飲醇酎  
剛腸出清婉遙思吳宮魂故作楚辭挽勿為花所留興  
盡要知返

館中三月晦日聞鶯胡邦衡有詩用東坡醑醑

韻有君側無讒人發口不須婉句某次韻

久傷伐木廢每歎吾生晚黃鳥從何來喬林綠垂幘忽  
作相呼聲朋來無近遠高翥凌雲烟斜飛集池苑中有  
幽谷次遲遲下遙巖羣音巧相和出語獨不婉啞啞如  
老鳥聞者弓欲挽知心有杜鵑勸爾故園返

上賜講讀官建茶某以說書與馬以十餅分贈

太學同舍芮太博輝有詩次韻

天表初容咫尺親雲龍重拜太官珍賜從明主恩尤

渥分及清流事更新搜卷要須嘗七椀乘風便合到三  
神諸公異日沾君貺願寄江湖老散人

四月從駕詣德壽宮與諸公會食于和樂樓  
是日借洪景嚴承旨馬戲云從駕濫騎承旨馬

朝天叨綴舍人班

時為起居舍人

異日再集胡舍人邦

衡云不可不成篇也遂於樓中足之

殿坳經幄侍清閒學術空疎媿在顏從駕濫騎承旨馬  
朝天叨綴舍人班登樓雖喜民和樂論事還驚世險艱



聖主英姿同藝祖諸君何苦戀湖山

時議欲乞移蹕建康侍從諸公有異

論者故云

用登和樂樓韻酬胡邦衡送別兼簡劉韶美秘

監

未訪鄱陽范與顏

顏魯公范文正公俱守鄱陽

雁山深處且投閒紫

泥長記曾同召丹陛何繇更對班我媿未行平日志公

應不創昔時艱筆端能制人生死兼有劉郎在道山

予與

邦衡韶美嘗同為編修官予既入臺即罷史職而二公如故

去國

六月十九日

去國常憂國還家未有家

先人敝廬為風雨所壞

君恩報無所含

媿出京華

重游釣臺

三年兩泝釣灘濤來往何曾補一毫  
聖主雅恢光武量  
微臣當遂子陵高

弭棹祠堂下一天星斗明客星尋不見  
影浸釣灘清

過婺女同年王節推夷仲黃教授萬頃鄉人華

主簿子周會飲雙溪樓

年時嘗泛婺溪舟未上清風八詠樓天為故人償夙願  
辛巳五月至婺溪夷仲諸同年有登樓之約忽聞欽宗諱遂止焉水知吾輩喜清流沈

郎不為吟詩瘦王粲長懷去國憂明日山川共人遠鄉  
情年契兩悠悠

游仙都

皇都歸客過仙都厭看西湖看鼎湖洞接龍泓片雲近

有龍泓洞

山分雁蕩一峯孤

有石柱壁立如雁蕩天柱峯

香清天上碧華

落音好林間青鳥呼天遣林泉慰吾輩不容身世老迷塗

游洞谿

舊名惡溪因段成式改名好溪有唐太守李君卿十詩有亭名思賢

段公不到溪豈好李守已亡詩更奇偶向思賢亭上坐  
愛溪兼愛昔人詩

重游石門洞

石洞幾時闢石門長不扃貪看一派水三載兩回經  
誰把銀河水直從天半傾好流入世去一洗四維清

寄題喻叔奇亦好園

喻子有園堪養親栽花種竹清且新堂中戲罷即策杖

叔奇有母家有戲綵堂

在家有此何憂貧弟兄既好園亦好

叔奇與兄

伯壽同登科

大勝吾家園小小兩園松竹懷主人他日歸來

各須早

種蔬

癸未孟秋歸自武林小小園荒蕪之甚遂課僮僕畦以植蔬近得微雨頗有生意潛澗老叔分蔥薤數十

本及菜子一二種今冬百指可以無饑矣書十五韻

歸來日彈鋏食無肉與魚却將種花地町畦毓嘉蔬驕

陽每抱甕時雨親荷鋤青青有生意令我顏色舒寧憂

饑與饑亦有瓶中儲前身老闍梨

或云予前身嚴闍梨也因以戲云

蔬

氣端未除文字亦宿業復生魚蠹書蠹書仍食蔬苦淡

味有餘况茲清淨根分來自僧居端能納須彌聊爾秀

郊墟洗我腥羶腸

退之詩云聲名暫羶薌非止為魚肉也

襟宇生清虛豈

惟陶淵明吾亦愛吾廬荒園涉成趣枯藤當安輿困枕

案頭卷飢著盤中菹孔門陳蔡色借問何如予

予素不善棊孫先覺萬大年林大和見訪戲與  
對壘偶皆勝之因作數語

予手不善談臨局氣先怯偶逢孫萬林三戰輒三捷都  
緣敵不勅非以臺威脅孺子濫成名凱奏意殊愜三君  
皆壯士小挫未肯厭予今務持勝堅壁不容劫

予昔在館中每

與同舍郎陳阜卿手談既而陳遷臺察一日相予棊諸  
公戲云陳今有臺威公必敗予偶勝之陳笑曰公果不

畏臺  
威邪

大年和棊詩復次前韻

君棊如龍且初笑韓信怯我棊似公瑾赤壁真橫捷但  
知貪旁角不覺攻背脇主人本無競勝負兩俱愜嘉賓  
儻再集鏖戰定誰厭新篇尤逼人我輩徒劫劫

太白晝見

太白晝見久矣予是日始  
親見之八月二十六日

煌煌太白生東方追逐殘月生光芒太陽中天不肯藏  
過午一點猶微茫太史占之此何祥咸憂兵起人流亡

金行用事多灾傷

六月十五日大風水七月朔日又作  
八月二十一夜地震自秋七月不雨



浙西飛蝗蔽天

大風地震水旱蝗有一于此宜預防雜然並見

何以當臣言天意未可量滔天赤地興堯湯偃禾拔木

悟成王宋景一言國乃昌災異不作憂楚莊吾皇修德

應彼蒼去讒遠佞任忠良推誠納諫正紀綱內修政事

仍外攘誓雪國耻還封疆強敵當弱吾當強

天文志太白與日爭

明強國弱國強

天戒為福非為殃願勿徒以虛文禳

### 荆婦夜績

涼飈墮黃葉促織催女工鬢絲不堪織細君哀我窮青

燈續深夜續成寒素風願為隱者衣德耀隨梁鴻

術者謂予命犯元辰故每仕輒已予笑曰有是  
哉戲作問荅語

問君胡為入臺省問君胡為官輒冷宣尼猶且畏元辰  
羊鼠龍猪作君梗退之宿直斗牛箕聲名謗毀常相隨  
死生窮達端有命予知之矣當安之

再至雙植堂呈表兄李克明

此日一樽酒再游雙植堂湖山浮野色草木帶秋光東

道德已熟西風花更香相看俱老矣會合意尤長

九日寄表叔賈司理

并引

某昔從潘先生學九日登鹿迹巖嘗賦詩呈諸長者  
時年十七今閱三紀矣當時和者賈太孺潘先生劉  
謙仲覺閣梨皆一時詩人也其猶能記其略數老人  
化去久矣思之慨然司理丈鹿巖賢主人也佳節必  
盛集某恨不獲奉樽俎輒成古詩十韻以記舊事并  
以蒙泉酒鳳團茶為壽

憶昔從師學絃誦年與賈生相伯仲

某時與諸賈昆季游皆年少也

九

日登高鹿巖脊感物題詩筆初弄舊游回首半零落三

十六年真一夢當時唱和三四老尚有殘篇可吟諷今

年節物身在家行樂山間謾隨衆弟兄勸我登高山身

似駑駘不容鞚

兄弟鄰里欲同登高某以時多凶荒灾異及賤軀多病止之

河東先

生今靖節有酒寧湏白衣送朋尊聊獻菲蒙泉

近日蒙泉酒下

佳趣有菲泉最下品酒也可以菲蒙泉名之

賜茗仍分小團鳳願公一飲壽

千齡三物年年敢馳貢

九日不登高與兄弟鄰里就敝舍飲菊

中秋對明月

中秋亦就家賞月

九日逢黃花節物豈不好而況

身在家樽酒醪鄰里盤食飮魚鰕何必登高山清歡自無涯

仙居陳少曾寄錦石杯書至乃九日也方與坐客把菊遂用以勸酒

九日登臨有雁來書傳坐上手親開呼兒滿酌黃花酒為子深傾錦石杯

僕夫浚井得雙鯽一鰻未及烹也藏之泥水間  
予見而放之因作數語

三秋不雨泉脉枯僕夫浚井欣得魚刀砧已具未及殺  
我偶見之魚再活親投不敢使校人圍圍洋洋生意新  
莫嫌井小思滄海尺水相忘聊自在

得張大猷尚書書云比每進對屢以待御為

言而邦衡舍人言尤數切

云云

某為羣邪所疾

獨見知二公因讀邦衡和和樂樓詩復用前韻

一月霜臺屢犯顏未回天聽已身閒  
愛君憂國寸心赤感物傷時雙鬢斑  
文舉才疎意徒廣子雲思苦語尤艱  
尚書左史雖知我超海應難挾太山

次韻題寶印叔蘭若堂

何處名蘭若依山結草堂  
花枝法雨潤心地佛燈光浮  
世囂塵隔空門歲月長  
林間有啼鳥聽法亦來翔

藤杖

頭角槎牙萬歲藤  
徧身節目更稜稜  
山僧贈我非無意

要我清閒亦似僧

予還自武林葺先人敝廬淨掃一室晨起焚香  
讀書於其間興至賦詩客來飲酒啜茶或奕碁  
為戲藏書數百卷手自暴之有小園時策杖以  
游時遇秋旱驅家僮浚井汲水澆花良天佳月  
與兄弟鄰里把酒盃同賞過重九方見菊以泛  
觴有足樂者每覽鏡見蒼顏白髮亦聊自歎也  
作小詩十五首



掃室

灑掃學者事陳蕃胡不然要令天下淨端自室中先

焚香

掃地眼塵淨焚香心境清案頭時一炷邪慮不應生

讀書

入政慚無學還家更讀書翻同小兒輩相共惜居諸

賦詩

秋興最難遣詩懷如亂雲雖無少陵筆一飯不忘君

飲酒

我意豈在酒銜盃聊樂天客來同一醉客去獨高眠

啜茶

濫與金華講賜沾龍鳳團却歸林下飲更媿是麤官

奕棋

光景老尤惜忍銷枰奕間娛賓欠絲竹一局戰清閒

暴書

秋日更可畏所宜惟暴書反身還自笑均是蠹書魚

策杖

園小日思涉山高時欲登老來疲脚力興至策枯藤

汲水

汲井得鰾放之明日水漲而清僕夫云鰾能穿石眼通泉脉故戲汲之

山中久不雨汲水欲何從一夜井泉達靈鰾恐是龍

澆花

花木正憔悴秋陽那更驕驅童綆深井聊助化工澆

賞月

還舍八十日三逢明月圓停盃試一問歸去定何年

采菊

既晚開何益采之聊泛觴書生自頭白奚用泣馨香

覽鏡

可正宜頻覽無塵亦自磨少陵今老矣功業欲如何

浚井

旱久井垂涸汲多泉更渾浚教泥淨盡何患不逢原

酬林明仲寄書并長篇

名季注

江頭一別九十日路隔烟波望欲迷風送雁羣來雁蕩

書從梅嶼到梅谿  
羨君筆力能豪健  
贈我詩篇過品題  
謝客江山富觀覽  
城南何日手重携

昌齡欲游白石興盡而止  
予亦思前年之游遂  
次其韻

前年蠟屐遠尋幽洞府  
曾經一宿留  
詩句親題碧雲裏  
夢魂時到白巖頭  
風生見說欲飛去  
興盡何如且罷休  
他日相呼老兄弟  
飄然杖屨共翔游

洪丞不負軒

坐此軒無媿問君何以能所行皆是學不負豈惟丞鳧  
驚文書靜槐松詩思凝博陵徒種績踐履亦何曾

周丞奉挽詩

同年周敏卿父

平生義方教真是起家媒有子願已足無心官自來興  
隨鳩杖逸情為雁行哀想見長塘水淒涼遶夜臺

黃巖趙十朋賢士也有詩云四枚豚犬教知書  
二頃良田盡有餘魯酒三盃棊一局客來渾不  
問親疎予亦有東臯二頃兩子皆學讀書客至

則奕棊飲酒遂用趙君詩意成一絕

薄有田園種斗升  
兩兒傳授讀書燈  
客來一局三盃酒  
王十朋如趙十朋

陳商英挽詞

貴似金張富石崇  
紛紛老死利名中  
退居不見香山老  
肥遁誰知秀野翁

商英號秀野翁

溪上園因種花闢  
牀頭金為

好賓空潛然痛念公  
兄弟二十年前筆硯同

陳商霖挽詞

疇昔游從分不輕十年鄉校讀書燈德星會聚三兄弟

詩社追隨八友朋

昔在招仙館有八叟之號商霖號可叟

去國悲涼老王

粲還鄉牢落失陳登誦君生死炎涼句斜日寒天涕滿

膺

商霖嘗有詩云生死交情誰念舊炎涼世態競迎新

萬清之有詩三絕呈司理賈大并簡某因次其

韻

燈花端為故人然留客殷勤為擊鮮更覺門闌增喜氣

冰清玉潤兩俱賢

清之司理婿也



世路塵埃逐日生  
鹿巖高卧自風清  
吾皇有詔求遺逸  
行見臨雍拜老更

甘言耻効蜜刀翁  
逆耳空餘剗畝忠  
願子他年似房杜  
好將一語記文中

再用前韻

論文尊酒意歡然  
蠟炬高烧夜色鮮  
得堦端同權相國  
傳經更似老常賢

右呈司理

僚壻欣逢舊友生人如王謝氣尤清十年前已心相許  
細看新詩貌愈更

右酬清之

士論鄉評重乃翁賢如狐突教兒忠治安策就君宜獻  
宣室開時夜正中

右贈大老

司理子

未臘而雪豐年兆也大老有詩次韻

明年禾黍定千鍾瑞雪攬先舞曉風更願平淮捷書至

西平擒賊獻司空

主人開燕倒金鍾坐客俱吟柳絮風應念人間有貧者  
爐星撥盡酒瓶空

雪中寄梅花與清之大老

天花除惱臘前雪香藥報春溪上梅分贈鹿巖龍穴友  
異時俱是百花魁

題夢齡五桂堂

我昔曾栽會趣堂子今封植更芬芳勝它福峙三珠樹

賽却東嘉五馬坊

永嘉王氏雙桂  
正在五馬坊

靖節柳青寧耐久大

夫松老恨無香何如移得蟾宮種不媿靈椿實十郎

寄鯉魚與萬大年

江楓搖落江梅破江上詩人有佳句欲於龍穴覓明珠  
試遣鯉魚傳尺素

梁府君挽詩

麗水人子  
安世登科

兩郡三鄉賴保全乃翁劍學不虛傳黃巢詎敢臣周朴  
趙勝那能爵魯連仁里化成儒氣象心田種得佛因緣

金 卷之七  
奇兒自是青雲士行見榮光燭九泉

永嘉盧仲修永年袖文見訪酬以短句

地僻原名左天寒歲欲徂遙遙屈佳客得得訪潛夫一

第且恩子八篇真起予

有論  
八篇

蜚聲叅四傑誰復敢前盧

林明仲和詩復用前韻

屢戰夷吾卒霸齊棘棲鸞鳳暫沉迷探春想見登梅嶼  
乘興何訪泛雪溪樓上清歡庾公興橋間壯志馬卿題  
四場筆力媒身策平步青雲豈待携

張器先和詩復用前韻

心欲齊賢媿未齊  
遠蒙佳句警昏迷  
音如鼓瑟鏗清廟  
味似煎茶闢建溪  
憂國非同長卿病  
感時端類少陵題  
二松豈是淹賢地  
鳬鷺文書漫抱携

寄蒲墨與明仲

四友共文房  
蒲君最異常  
研磨發文采  
好去奉仇香

寄沈敦謨

名希臯  
瑞安人

二十年前舊友生  
緘封遠寄見交情  
舊游回首多零落

大器如君合晚成

送謝任之

七歲吾從乃祖游  
童蒙深媿未能求  
堪嗟四十五年事  
昔未裹頭今白頭

梅溪闢館子來游  
回首如今二十秋  
端似韓張互傳授  
要令編剡紹箕裘

去年還家已半年  
盍簪尊酒數留連  
歲窮送別溪頭路  
手把梅花思黯然

題雙瀑

女媧石爛幾經修天漏猶餘兩派流  
離合無心元不靜朝宗得路却相投  
干雲寶劒真同氣出蕩神龍不異湫

雁蕩有大  
小二龍湫

何用築門防俗駕林泉自是少人游

雙瀑亭  
壞久矣

洪丞命工起廢氣象一新且  
欲築門以防俗駕故及之

癸未守歲

歲宜鄉里守杯共弟兄銜明日人相問行年五十三

張器先復和詩作五言以寄



短棹別孤嶼故山歸左原遙煩雁足字重到崔羅門歲  
月添新老文章憶舊論見詩如見面氣象有餘溫

萬孝全贈金華洞石名雪灑遙峯作進退詩次

韻

天闢金華一洞奇洞中石是化羊遺渾疑雪向閩山落  
更訝峯從天竺飛谿上又添乘棹興案頭如照讀書時  
故人重我膏肓疾田不荒蕪應亦歸

元宵鄰里携具就敝廬張燈辭之不獲因成一

絕

凶年猶幸在家鄉鄰里相過具豆觴我輩忍將燈照眼  
游人多是火燒腸

祈雨不應

歉歲還鄉益困窮瓶無儲粟酒尊空醉經且學文中子  
閔雨難祈應上公

自秋七月不雨至于春二月十九日僅得雨昌  
齡作賀詩予未及和而雨止矣遂次韻以閔之

水旱年年費請求仰勤湯禱與堯疇何時三十六雨足  
當宁免懷雲漢憂

一杯未吸甕頭春

初欲率飲賀雨以晴遂止

三疊聊歌雨裛塵不用

遽興風伯訟洪羊真是可烹人

社日喜雨復用前韻

社日簷間不斷流淵明欣欲事西疇願言一飽均黎庶  
瓶粟無儲不用憂

欲放乾坤萬里春要須先洗庾公塵朝紳賀雨詩多少

誰是詩中諷諫人

家食遇歉有飯不足之憂妻孥相勉以固窮因  
錄其語

淵明事高尚瓶中缺儲粟魯公凜名節乞米給饘粥廣  
文富才名官冷飯不足少陵老風騷掾粟拾山谷嗟予  
何為者處世真碌碌謀生一何拙甌石無儲蓄三年兩  
去國囊橐罄水陸還家索租苗不了臘與伏前秋遭颶  
風摧折數間屋今年丁大祲破甌塵可掬絕糧瘦百指

告糴走羣僕鄉鄰苟不救定恐填溝瀆家藏千卷書父  
子忍飢讀一字不堪煮何以充我腹細君笑謂我子命  
難食肉去歲官臺省僥倖食君祿有口不三緘月奏知  
幾牘聖主倘不容寧免遠竄逐歸來固已幸富貴非爾  
福東臯二頃田得雨尚可穀子耕我當耘固窮待秋熟  
聞小使胡昉抗金不屈上甚嘉之有旨命右揆  
撫師仍有和不可成之語皆出睿斷宗社之福  
也昌齡有詩次韻

用儒端可復侵疆活國何勞別取方文帝要須親御馬  
子卿寧患遠看羊撫師暫屈黃扉老論將寧咨白首郎  
行見車書混天下豈容南北分三光

昌齡四月十九日得男請名於予命之曰遲

端似中山夢得詩海中仙果子生遲况當首夏清和後

更遇千秋啓建時

是日啓建  
天中節

祝爾願同彭祖壽命名聊

効小蘇兒

蘇黃門子由子名  
曰遲其後最盛

吾家種德已數世庭戶合


生蘭與芝

山丹花

四月相將莫山丹開始都真心本來赤正色自然朱百  
合晚仍俗石榴繁更麗誰將僊竈藥花裏著工夫



梅溪後集卷七



總校官庶吉士 臣侍 朝

校對官中書 臣金光悌

謄錄監生 臣黃廷璧